

畿

輔

安

瀾

志

畿輔安瀾志

桑乾河卷上

原委

桑乾河卷下

附載

隄防

橋渡

祠廟

水利

畿輔安瀾志

桑乾河卷上

原委

桑乾河盧溝河上源也一名涿涑水源出山西忻州

鄯樂縣

漢曰汾陽

燕京山之大池洑流

水經注濕水篇濕水又東北流左會桑乾水卽涿涑水者也其水潛承太原汾陽縣北燕京山之天

池池在山原之上世謂之天池古老相傳言常有
人乘車於池側忽遇大風飄之於水有人獲其輪
於桑乾泉故知二水潛流通注矣 山海經北山
經又東北二百里曰天池之山繩水出焉潛於其
下 李吉甫元和郡縣志嵐州靜樂縣天池在縣
北燕京山上周回八里魏孝文帝以金珠穿魚七
頸放此池後於桑乾泉得之 方輿紀要燕京山
卽管涔山大池在管涔山北原上卽汾水之源

也北人謂天爲祁連亦謂之祁連池相傳其水潛通桑乾 二統志靜樂縣屬太原府雍正二年改屬忻州

謹案桑乾河元史云出代地河防志云出大同桑乾山今水經云馬邑縣洪濤山路水客譚以爲發源渾源州其說不一桑乾山古無是名蓋卽洪濤山此桑乾河重源再見者也其發源處要當以水經注元和志爲據明史河渠志從之吳道南集亦

水經注卷之八
云盧溝河出太原天池狀流據山海經則桑乾亦
名繩水而潛洑之說無異又據水經注汾水亦出
管涔山蓋同源而異流桑乾獨洑也

東北出朔州馬邑縣西北洪濤山下爲七泉統名之
曰洪濤泉卽桑乾泉也崞川水自劇陽注之亦曰鄯
河

李吉甫元和郡縣志朔州馬邑縣桑乾河在縣東
三十里 方輿紀要馬邑縣東南至太原府百里

洪濤山在縣西北十五里 又天池泝流至洪濤
山下匯爲七源曰上源曰玉泉曰三泉曰司馬洪
濤曰金龍池曰小蘆曰小蒲合爲一流是爲桑乾
河之源 水經濕水出雁門陰館縣東北過代郡
桑乾縣南酈註縣西北上平洪源七輪謂之桑乾
泉 又崞川水南出崞山縣又西出謂之崞口北
流逕繁峙故城東又北逕巨魏亭又北逕劇陽縣
又東注於濕水 二統志洪濤山桑乾水出焉山

有七泉湧出俗名洪濤泉 又鄆河在朔州東東
流入馬邑縣界入桑乾河

謹案一統志司馬洪濤爲司馬泊與方輿紀要異
山西通志洪濤山下有七泉湧出名黃道泉土人
又名洪濤泉是黃道洪濤皆爲七泉之總名又云
桑乾水至洪濤山黃道泉與金龍池水合流至邑
之西是黃道與金龍明是兩泉又一統志黃道泉
縣西八里金龍池縣西北十里小蒲西北五里山

西通志三泉一一在縣南五十里一在縣東五十里小蒲泉在縣西北五里黃道泉在縣西北八里上源泉在縣西北十里金龍池在縣西北而司馬泊不言里細蘆灣泉在縣西北派同金龍池水玉泉在縣西北雁門山西皆叅差互異考上泉玉泉在雷山東側洪濤山下俗名神頭山三泉出三眼故名在今馬邑縣治西北十里之神頭村由洪濤山北湧出寬被九十餘丈池廣二畝許俗呼神頭

海子司馬洪濤在金龍池上流中有陂陀泉北有
村名司馬泊小蘆俗名細蘆灣又稱戲龍灣小蒲
今曰小泊東有小泊里村今其地名曰南小蒲又
別有溪曰喇河至小泊與諸泉合流注於馬邑城
南蓋七泉俱承天池之沍流特隨地異名不得專
指一泉雷山與洪濤連接本不甚遠或以爲洪濤
山之下或以爲雷山之陽皆可第專舉金龍池言
之則不可而今水經謂桑乾河源出大同府馬邑

西北洪濤山下與金龍池水合則更欠分曉至山
西通志既謂桑乾河發源黃道泉金龍池二水匯
於喇河復云桑乾水發源喇河口西北至洪濤山
黃道泉與金龍池水合流則更費解矣又據水經
注濕水出於累頭山一曰治水泉發於山側東北
流山山逕陰館縣故城西又東北流左會桑乾水
其水潛承太原汾陽縣北燕京山之天池是則濕
水入桑乾桑乾承天池明甚而方輿紀要謂濕水

在馬邑縣南一名治水洪濤山一名累頭山是濕水發源洪濤卽會於洪濤矣成何語乎况酈注旣明具山曰累頭山又申之曰治水中間又逕陰館縣而於桑乾水則曰縣西上平洪源七輪謂之桑乾泉是濕水至此始有桑乾之名蓋七泉上承大池旁入濕水也竊意濕水桑乾渾河自是三河先濕水入於桑乾後渾河入於桑乾三河并爲一河乃有盧溝之名諸志或稱桑乾或稱渾河或稱盧

薄不過一水而異名於是明史河渠志則謂桑乾
河自馬邑渾泉溢出是爲桑乾水部備考則謂盧
溝河至馬邑發爲渾泉流爲桑乾吳道南集盧溝
至馬邑迤邐東下曰桑乾河直不復辨其若何當
稱桑乾若何當稱渾河盧溝矣又鄴河卽崞川水
以其出於善陽故又曰鄴河或謂濕水合於桑乾
出於善陽故曰鄴河非也

過永濟橋東南合流逕縣城南灰河之水合青羊渠

臘河吁澗河七里河泥河沙河楞河自西注之曰馬
邑川

水經注桑乾水自源東南流右會馬邑川水水出
馬邑西川俗謂之磨川矣其水東逕馬邑縣故城
南二統志灰河在朔州西南自寧武府寧武縣
北流入又北至馬邑縣南入桑乾河卽古馬邑川
又青羊渠在神池縣東北滙諸山谷之水流入
朔州灰河臘河在朔州北二十里洪濤山之陽南

流合圩澗河注灰河圩澗河在朔州北十里源出
州西北石槽村東南入灰河七里河在朔州北七
十里流逕酸窰村東南入灰河泥河泉在朔州西
五十里東流泄爲西湖南入灰河沙楞河在朔州
東南三十里流逕賈家莊東入灰河

又東流逕大同府山陰縣北界又東流逕應州北黃
水河白泥河清水河木瓜河諸水入焉

方輿紀要桑乾河在山陰縣北自馬邑縣流八界

又桑乾水在應州北自山陰縣流入境 〔五代志〕

黃水河在山陰縣城西出龍灣峪口東北流至應

州西北八里莊注於桑乾水 〔山西通志〕黃水河

發源雁門關之東廣武之西流出三泉口至山陰

縣朱家莊入於桑乾 〔一統志〕白泥河在山陰縣

東源出縣東南界榆林峪東北流入應州界 〔謹案〕

通志 清水河木瓜河在應州西北東流入桑乾

河

謹案黃水河自另是一水元史河渠志以盧溝爲
小黃河明將一葵有黃河伏流之說說者又謂近
代有黃水河之目而濕水治水之名反隱皆非也
又東流逕趙霸岡之北又東流渾源川注之爲渾河
亂嶺關磁窯峽李峪凌雲口遠望峪神溪水乳泉唐
泉諸水入焉

遼史地理志應州渾原縣有渾源川在州東南一
百五十里方輿紀要渾源川在渾源州西北十

里源出州西南漢土峪分流至州東北匯爲大澤
西流至城北五里之神溪曲折西北入於桑乾河

〔二〕統志趙霸岡在應州東一百二十五里亂嶺
關水在渾源州東四十里磁窯峽水在州南十里
李峪水在州西南十里凌雲口水在州西南三十
里俱北流入渾河遠望峪水在州東南十里西北
流入渾河神溪水在州西北鳳凰山下乳泉水在
州西二十里一名西神溪水唐泉在應州東安邊

鎮白石澗流俱入渾河 山西通志 八水合而渾
流故名渾河

謹案渾源川發源渾源州恒山下東北亂嶺關至
沙圪坨伏入沙中越十餘里至烽臺鋪出泉西流
會神頭村海村等泉南流匯應州之白土河入桑
乾河渾河之名如此一統志謂崞川水在渾源州
今名渾河又謂瀧水爲渾源川皆非也崞川水渾
源川自是二水瀧水據水經注出靈邱縣高氏山

禹貢錐指云翠屏山卽高氏山之別名東南接靈
邱界是也水部備考謂盧溝河從雷山之陽發爲
渾泉流而爲桑乾潞水客譚謂桑乾水發源於渾
源州行水金鑑渾河源出大同府桑乾山下皆欠
分曉

折而北流逕懷仁縣南大峪水小峪水合流注之俗
謂之懷仁河金龍山水鎮子海聖水泉入焉

方輿紀要懷仁縣在大同府南六十里桑乾水在

縣南自馬邑流入其南卽山陰縣界也大小石峪
水自應州南山中流至州西舊城外合流入桑乾
河大石口州南三十里與代州繁峙縣接界小石
口州西南三十五里亦屬繁峙縣界 山西通志
金龍山在縣西南七十里山下有泉通馬邑金龍
池鎮子海在縣東南十五里高鎮子堡海周四十
五里水經注南池水又東北注桑乾水以地形考
之當係鎮子海聖水泉在縣東南二十里海子村

北

又拆而東逕大同府大同縣

漢曰平城

南界則有如渾水

自塞外挾諸聞澤羊水靈泉池諸水逕得勝堡宏賜

堡合武周川

一作武州

水繞城東北西南流注之是名御

河則有滄頭河南大河兔毛河廖家河新莊河石崩

寒泉水磨河諸水入焉

水經注渾水出涼城旋鴻縣西南五十餘里東流

逕故城南北又東北流逕永固縣石會羊水又南

至靈泉池枝津東有注也如渾水又南分爲二水
一水南入北苑中一水南逕自登山西又南逕
平安縣故城東又南與武周川水會又南流逕班
氏縣故城東又東南流注於濕水 又武周川水
出縣西南山下二源合成一川北流逕武周縣故
城西又東北右合黃山水聖山之水注焉又東歷
故亭北右合火山西溪水火井東湯井又東南流
出山武周塞口者也自山口枝渠東出一水自枝

渠南流東南出火山東谿又東注武周川逕平城

縣東南流注如渾水

謹案山西通志今如渾水枝津暨泉池大概淵塞

方輿紀要大同府桑乾河在府南六十里如渾水

在府東北四十里志云出開山口一名御河其水

兩源合而爲一厯府城東又南流與武川水合注

於桑乾河得勝堡在府北五十里宏賜堡在得勝

堡東二十里武州山在府西二十里武州川水所

經也武州水在府南十五里俗名合河源出武州

山西白羊山谿谷中爲石渠流至府南又東南注
於如渾水 二統志太僕寺右翼牧廠在張家口
西北三百十里漢驢陰縣地明爲大同府邊外齊
齊爾漢河卽牧廠地古如渾水也源出色爾蚌山
東南平地經和爾和山南流會和爾和河入邊城
色爾蚌河在牧廠西十里源出色爾蚌山南流與
齊齊爾漢河合

謹案二志以此爲如渾水則色爾蚌河似卽武州川水

色爾蚌

山在牧廠東六十里和爾和山在牧廠西南四十

里如渾水在大同縣東北四十里自塞外南流又南至縣東南入桑乾河今名御河府志御河源出府東北邊牆外葫蘆海經得勝堡東宏賜堡西過府東門外又南流與武周川水合又諸聞澤漢

書地理志彊陰有諸聞澤在東北或曰卽旋鴻池

或曰卽威寧海子滄頭河在平魯縣北

謹案方輿紀要南流

入兔毛河南大河源出平魯縣東北流入右至縣南界

支流合兔毛河源出平魯縣南繞流朔平

府城西分爲二一會南大河東流經雲陽堡東五
十五里入左雲縣一北流逕殺虎堡出口外西流
入烏藍木楞河西南流入黃河

謹案方輿紀要西至東勝州入黃河

陽史地理志亦於東勝衙下云入黃河
蓋西分一支入黃河一東流入御河也
廖家河在

左雲縣北源出縣西南至大同縣入御河今名十

里河武周寨水在懷仁縣南七十里源出縣西新

莊村東流逕薛家莊又東南入桑乾河一名新莊

河又名南河

謹案卽武州川水水經注武周寨口自山口枝渠東入苑一自枝渠南流

東南山也石窟寒泉在大同縣西三十五里武州山至

府城南入如渾水磨河在大同縣東門外源出平

地東流入桑乾

又東流逕聚落堡城南又東流逕陽高縣

漢爲白登臺地北魏

置高柳郡蟠羊山下渾源州北又東流逕天鎮縣五泉河

入焉又逕廣靈縣北

漢曰延陵北魏隸蔚州

〔水經注〕濕水又東北逕平邑縣故城南十三州志

曰城在高柳南百八十里北俗謂之醜寅城又東

逕河陵南又東逕猗氏縣故城北十三州志曰縣
在高柳南百三十里俗謂之苦力干城矣又東逕
道人縣故城南十三州志曰城在高柳城東八十
里 一統志平邑故城在陽高縣西南沙陵城在
陽高南猗氏廢縣在廣靈縣西北道人故城在陽
高縣東南聚落堡在大同縣東六十里明天順三
年築堡城周三里陽高縣在府東北一百二十里
明陽和衛桑乾河東流入縣界蟠羊山在陽高縣

東今訛爲白羊山天鎮縣在府東北一百八十里
明天成衛桑乾河東流入縣界 山西通志天鎮

縣五泉河發源溫小堡定安營興隆堡龍池堡顧
家營五泉至鹹水皂合流經陽高大同復入縣境
嘴兒頭入桑乾 邊防考桑乾河在廣靈縣

又東流入直隸宣化府西寧縣 漢曰陽原西南界又東流

逕縣治南則有柳園泉一突泉 一名吐泉又一名一堵泉合許河

之水繞城西南流注之

二統志西寧縣在宣化府西南二百里漢置陽原
縣屬代郡 水經注濕水又東逕陽原縣故城南
北俗謂之北邙州城 畿輔通志桑乾河自山西
天鎮縣流入西寧縣 西寧縣志柳園泉卽西海
子西城西二里一突泉西城西北三十里湫河在
西城西門外

又東流逕馬房又東流逕東城堡又東流逕順聖廢
縣又名順聖川

二統志三馬房在西寧城東十五里四馬房在縣東十里七馬房在縣西十里八馬房在縣西二十里西白馬營在縣東十五里又東一里爲東白馬營順聖東城明天順四年築謂之順聖川東城

本朝初屬蔚州衛康熙三十二年并入西寧縣順聖廢縣在西寧縣東六十里遼置明初縣廢順聖川在西寧縣東

謹案諸書皆以順聖川馬房爲明初兵制考遼史

百官志有渾河北羣馬司則川原之宜畜牧久矣
又方輿紀要順聖川在順聖東城南卽桑乾河支
流也東西延袤二百餘里明史地理志宣府左衛
南有桑乾河又有順聖川延袤二百餘里下流亦
合於桑乾河二說各異而縣志載邑人林盛順聖
川辨直以兩山夾峙形如川然故名曰川非眞水
也則似自昔並無此水矣川之名川皆取於水六
書之義亦象水也乃止取字形而反謂無水然又

以爲百餘里之順聖以水得名則必源遠流長乃
除桑乾一水外別無他流可據則紀要支流之說
似爲得之蓋昔爲桑乾支流所入而後乃湮廢也
又水經注濕水又東逕陽原縣故城南又東陽水
注之水出縣東北澤中北俗謂之太拔回水以地
形擬之亦當在西寧今無考豈卽昔之所謂順聖
川歟

南與蔚州分界

方輿紀要桑乾水在蔚州西北自廣靈縣流入境
畿輔通志桑乾河流入西寧縣與蔚州分界桑
乾故城在蔚州北

又東流逕大小渡口則有帝流河卽祁夷水合廣靈
縣之莎泉瑞泉百家泉灑雨泉枕頭泉集興噴池作
噴池蔚州之唐山泉滋泉暖泉乾沙河金河飛狐關
水飲馬泉靈泉七里河金波泉海子泉橫澗泉太平
河曾子河蓮花池扶桑泉諸水西南來注之

水經注濕水又東流祁夷水注之水出平舒縣東

逕平舒縣之故城南澤中漢書地理志代郡平

舒祁夷水北至桑乾入沽謹案沽爲治之誤元和郡縣

志渥夷河亦曰瓠盧河上槽狹下槽濶有似瓠盧

因名畿輔通志壺流河在城北一里東北流百

里至西寧縣東城界小渡口入桑乾河卽古祁夷

水也宣化府志壺流河在廣靈縣南源出沙泉

其形似壺一名葫蘆河山西通志祁夷水今壺

流河勢近之

謹案壺流河諸書皆以爲卽祁夷又以葫蘆源出
莎泉考水經注漚水篇漚水又東莎泉水注之不
云祁夷而漚水篇叙祁夷水所經歷又無莎泉則
是莎泉自入漚水與祁夷無涉也方輿紀要有廣
靈縣莎泉入壺流河當另是一莎泉非卽漚水之
莎泉也且旣以莎泉入壺流河又以祁夷水爲在
鹽邱縣北則壺流似非卽祁夷也今漚水之莎泉

不可考而入壺流河之莎泉據山西通志在廣靈縣西三十里又云一說滋水源出莎泉東注合壺川山下水名神泉二水合流其形如壺又引水經注云滋水導源莎泉考水經注原文溫泉水東流注於滹水又東泉水注之水導源莎泉乃於水字增一滋字可乎是皆因以滹水爲嘔夷又以嘔夷爲祁夷又以壺流爲祁夷又以蔚州之滋泉爲滹水四水俱混於是壺流之莎泉或失其名而卽以

涖之莎泉名之甚且增改水經注之莎泉爲滋惟
求其說之可以牽合互証而不顧其理之難通矣
古今水道之變原非可以曲爲之說但以壺流河
爲祁夷考水經注謂祁夷控引衆泉以成一川今
壺流河實爲衆泉所歸又以水經注祁夷水所入
之水証之則諸志以壺流爲祁夷其說固是也而
祁夷水水經注固未嘗言嘔夷也水經注註曰周
禮嘔夷之川鄭註云嘔夷卽祁夷又云酈註滄水

云卽嘔夷於是澠水嘔夷祁夷爲一水矣水經澠水酈本注固云卽溫夷之水也而水經注註埒

明

人

云溫夷當作嘔夷是澠水與祁夷水水經注自

是兩水而水經注註牽合者也於是後世以壺流河爲古祁夷而澠水滋水亦混而爲一矣又據水經汾水篇又南過大陸縣東酈註王莽改曰大寧矣汾水於縣左迤爲鄔澤地理志曰九澤在北并州藪也呂氏春秋謂之大陸又名之曰嘔夷之澤

俗謂之鄠城此則水經注漚夷之明文也水經注
注又引周禮註云漚夷祁夷也攷大陵縣爲今之
太原府文水縣與漢志之平舒縣屬今之渾源州
者相去遠矣而太原在唐夏商爲冀州至隋復改
爲冀州虞周秦漢以來同皆爲并州則漚夷之當
在太原無疑不特漚夷非涇水且並非祁夷自來
皆未之辨也又山海經高是之山滋水出焉而南
流注於庠沱澧水出焉東流注於河注云過博陵

縣之南又東北入於易水是滋與澠爲二源并不

入和夷也

澠水滋水另見

元和郡縣志既列澠夷河爲瓠

瓠河復有澠夷水一名澠水是與水經注註之誤

一也至壺流葫蘆瓠一河而異名亦猶之桑乾

渾河盧溝之稱明通志嘔夷葫蘆並載山西通志

葫蘆壺流異源徒滋惑耳 又案壺流河發源山

西大同府之靈邱縣

水經注出平舒縣括地志寰宇記方輿紀要一統志俱屬

靈邱東流逕縣西南白羊山林管山又東逕縣南直

峪山東流逕縣城南關外又東逕壺山又東逕唐
山又東入直隸蔚州西境崖頭村暖泉堡又東逕
李家碾又東逕蒲家莊南又東逕李堡子又東逕
仰家莊又東逕君子町又東逕下油平又東逕辛
家莊又東逕水門頭又東逕代王城北又東逕太
德莊又東逕柳子町又東逕西合營又東折而北
逕添照町鳳凰臺又北逕利臺村又北逕袁家皂
堡又東北逕鴛鴦站又東北出鴛鴦口又東北逕

水泉莊錢家沙窪鄭家沙窪與西寧縣之王家沙

窪相直而下逕東城之大小渡口入於桑乾河蓋

旋折於廣靈蔚州之境二百五十里而河身寬不

過丈餘深僅尺許旱則行旅可通人不病涉一遇

水潦衝決之患往往然矣

以上壺流河

方輿紀要廣

靈縣西三十里有莎泉山莎泉出焉

謹案此非涖水之莎泉辨

見前東流合於壺流河又東入蔚州境莎泉城在靈

邱縣東北祁夷水在縣北瑞泉出縣西五十里白

羊山中流爲小河注於壺流川林管山在縣西南
四十里下有泉名百家泉入壺流河 二統志林
管山一名林關山廣靈縣南有勒漢巖百家泉出
焉濬源林管山下入壺流河 山西通志灑雨

泉在縣西南二十里直峪山源出石罅北注枕頭

河枕頭河在縣南三里源出翟家疰集興疰池在

縣南五里水殊清湛冬夏不竭作疰河波池在縣

西十三里西山麓汪洋數里俱東入壺河

謹案以
上廣靈

縣入壺流河之水

蔚縣志唐山泉在城西南唐山口西

南泉細如簪自岸下注水聲潺潺不絕謹案水經

或謂之唐水也是以唐縣得名不得以此唐山泉為唐水而訛邢夷為潞水也一統志

滋泉在蔚州西南三十里源出南馬莊一名神泉

水北入壺流河元時居民爭水灌田以鐵板鑄九

孔分流今水涸板存謹案據此則非即高是山之

滋泉凡言滋水皆泥也皆不取水經注邢夷水又東北熱水注

之水出綾羅澤蔚州志城西三十里綾羅里有

暖泉澄清如鑑嚴寒不凍卽古熱水也乾河在州

南三十里源出太白山流二里出口入壺流河

謹案

乾河自九皆在蔚州境一出州西南石門路東
流逕蘇家町一出州西南直峪口東北流逕李堡
子張家莊抵故城北一出州東南乾河峪北流逕
朱家莊辛家塔又北流爲七里河逕君子町抵城
北一出州東南水峪口西北流水門頭一出州東
南九宮口西北流逕代王城北一出州西北山西
廣靈縣北山下東南流逕暖泉堡一出州西北乾
河峪東南流爲飲馬泉又東南流逕馬坡村下官
莊薄家莊一出州北小關村東南流逕陳家澗即
家莊至城北一出州東北盧子澗神仙口有聖水
泉注之東南流逕沙澗東新店諸河平時乾澗雨
則并流交注其附近城北之河尤爲險衝往往築

隄建壩
以之

水經注邠夷水又東北得飛狐峪魏土

地記代城南四十里有飛狐關關水西北注邠夷

水 一統志飛狐谷在蔚縣南今湮 輿地廣記

飛狐峪在蔚州南四十里 蔚縣志常山關在城

南縣石嶺間所謂古飛狐岌也謹案飛狐谷水今

豐水明史地理志豐水在蔚靈縣東南卽葫蘆河

上流滋水在縣西麓一名壺流川滋水當以爲卽

滋泉大而豐之與滋旣分葫蘆壺流亦且東西城

異說不足強爲之解據一統志第存其名可也

西有古飲馬泉 一統志壺流河南通城濠 蔚

縣志城外濠每門建石橋跨其上引東南隅泉水

注之歲久泉塞州人郝銘坎之復故號曰靈泉七

里河在城東七里北入壺流河 宣化府志金河

在城東八十里

謹案此卽水經注倒刺山水一統志金河在蔚縣東卽古倒刺山水

也畿輔通志一名小五台
山舊志西北入壺流河

金波泉在蔚州城東二

十五里代土城內其水素出金沙今無

謹案此卽水經注所

謂二源也畿輔通志代土城內有二泉合流而北
入金河方輿紀要東南流入滋水其稱滋水者仍
襲滋水混神夷之誤蓋入壺流河也金河在金
波之東是其下流全河下尾已斷無由入之

子泉在城北一百五十里隆冬不凍盛夏不竭太

平河在城東七十里源出縣馬蹄山經流水溝至

寧遠店與衆泉會過紅橋太平二堡又過吉家莊

定遠縣

亦曰定安河

至利寧堡入壺流河會子河在城

東六十里源出縣白樂東堡東南爲清水河經高

家莊會子里李家壩上礮頭至南吉家莊又過羊

圈堡任家莊小礮頭至袁家皂入壺流河

羅案會子河源

出三龍泉至上礮頭卽與太平河合入壺流河不
能北至袁家皂堡與志不合或水道有遷移也

扶桑泉在城東北水泉堡外扶桑廟前大池泉出
其中流堡西入壺流河橫澗在城東四十里蓮花
池在城東六十里內有蓮花一名東湖〔謹案此即
謂鄆夷東北之青牛澗中多蓮藕
各也以上蔚州入壺流河之水〕

〔謹案〕桑乾河自山西天鎮縣小鹽場

一名小鹽大
塘場

同府康石莊交界起流入縣屬東西白家泉堡其

南岸爲雙樹村堡吉其町王靈池曲長城鄧家莊

瑞骨瞳三泉堡

〔畿輔通志三泉堡在
西寧縣東南三十里〕

小辛莊開陽

堡雙塔堡泥泉堡八角砦西馬圈老君營馬圈堡
保神觀小渡口其北岸爲小莊兒大鹽場上回村
下回村牛蹄莊圪塔頭廣豐莊張順莊辛其堡小
白嘴簪子溝三分溝西水地東水地舍人莊大灣
營大渡口與壺流河合流至鎮河營出境長一百
餘里兩岸夾高無隄埝自馬邑縣流至西城三百
七十里河北有渠一道起小莊兒至張順莊止乾
隆十年開挑旋被水衝廢

又東流逕宣化縣南界

畿輔通志桑乾河逕宣化縣南界 二統志東逕
深井堡南三十里

謹案桑乾河之在宣化縣境內者西接西寧縣之
大小渡口合蔚州壺流河東流至縣屬華稍營前
入境南去城一百三十里又東逕東西打魚灣油
房里北合黑眼山之大黑溝乾少河又東狼洞溝
泉水注之逕百子井秦家灣又北會上河溝乾沙

河東出黑龍山黑龍灣泉水注之流三十里折而東南流九里逕下沙嘴又折而東北流七里逕謝家灣復東流逕水磨灣王家灣有泉水自北注之東逕栗家灣又東逕搶紅崖有泉水自南注之又東有乾沙河流入焉又東逕史家灣大沙河張家灣流三十二里折而東北逕西窑溝望扒梁有泉水自南注之又東逕胡甲里傅家灣李家圪塔北岸入懷來縣屬東窑溝蠻子營又東逕縣屬西眼

里而東入懷來縣屬之湛家莊上葫蘆有乾沙河起自西北圪馬山東南逕柴家莊有泉水流注之

又東南逕顧家坡馬家灣北入於正河又東過屬

山背長疇堡

保安州志正城西二十里蓋境相接也

抵十字坡

一名石子

坡

流三十五里上下兩山夾峙又五里至保安州

屬之南北孤山出境共長一百十八里深井堡在縣城西南六十里直黑龍山之北計其方位適得河流之半湧幢小品成化間有議疏天津水至宣

大省兵餉主事楊讚相度以地有游沙不可濬水
勢相懸有至二百丈又冬天險人力難施遂止明
實錄世宗嘉靖三十三年五月巡按山西御史宋
儀望言桑乾河在大同則北村稍有亂石在宣府
則黑龍灣石崖頗險其險與亂石不越四五十里
水淺處亦深二三尺疏鑿爲力甚易當時撫臣候
鉞常駕小舟踰黑龍灣坦行無虞又自懷來載米
三十石逆水竟達古定橋河足便漕有的徵疏下

兵部任其可行且稱都御史趙錦常使人從桑乾
河水行千里直抵大同城下稍加疏鑿不惟通漕
且因可以捍衛詔會工部計之以遼河重役報罷
蓋桑乾自發源金龍以達盧溝橋千有餘里欲謀
水運誠不易也

又東流逕保安州西南界出孤山下北爲平坡渠分
北孤山之水東北流入於洋河南爲百戶渠

一名河南惠民

渠分南孤山之水東南流歸於本河又東流五里逕

頭堡中惠民渠出焉東北流逕州城北下流入於洋
河又東流二里逕丁官堡南惠民渠出焉逕州城南
下流歸於本河又東流逕州城南汪源屯之公務渠
出焉東流歸於本河

明史地理志桑乾河在保安州西南自山西蔚州
流入 宣化府志南北孤山在保安州西十里兩
山對峙吞吐桑乾洋河在州東十五里發源長城
外河南惠民渠自張順屯起至七堡止計二十里

中惠民渠自頭堡起至周官堡止計十五里南惠民渠自丁官堡起至高廟村止計十五里

又東逕溫泉屯

宣化府志溫泉在保安州東南四十里今涸

謹案州境河身西起懷來縣屬之下葫蘆與宣化縣屬之石子坡出南北兩孤山峽入州屬其南岸

逕馬家莊張家莊西張順屯東張順屯高堡子頭

堡子小堡子

即二堡子

羊圈子三四五六七堡子九百

戶廣恩屯其北岸逕朝陽寺頭堡丁官屯汪源屯
高廟村新興堡保家莊至溫泉屯三十五里

又東流逕新保安城南垵出窩棚山麓

二統志新保安衛城在懷來縣西北七十里卽故

保安衛也其地本名雷家站

謹案方輿紀要作雷家站是因澤水而訛

也元周伯琦扈從北行後記鷄鳴山有雷家驛卽雷家站也

保安州志窩棚

山在沙城堡四十里明邑人來復新修保安衛

工程說畧保安初名灤家站景泰間置衛所屯堡

星錯東北乾水河爲諸水之匯夏雨漲發潏浪拍
天直逼城堦間濠谷斯須平滿甚且由門溢衢因
於水源處增築障水壩八十丈又補修園牆濠堑
一千一百二十丈亦一金湯也

又東流逕良田屯北又東流逕老君堂南又東流逕
榆林屯北

〔方輿紀要〕良田屯在保安州東五十里卽州民居
屯之所〔保安州志〕老君山在沙城堡正南六里

桑乾洋河經其下上有老君祠鄉人於此山鑿石
洞移像祀焉榆林屯在州東六十里

謹案宣化府志保安州尙有定方水金史地理志
德興有定方水鎮嶺北紀行循山之西而北沿桑
乾河以上河有石橋由橋而西乃德興府道也北
過一邱曰定方水逕石梯子則是桑乾水流至定
方鎮卽名定方水無他道也所云石橋卽金志龜
頭館石橋也

又東流逕沙城堡北入懷來縣西南境則有洋河合
清水河塞外諸山之水自北來注之曰燕尾河

二統志沙城堡在保安州東六十里

謹案沙城堪西屬保安州

東屬懷來縣桑乾河
起此始全入懷來

懷來縣志洋河在張家堡

東六里發源長城外至保家莊與桑乾河會於燕

尾河 遼史地理志奉聖州武定軍有兩河會

明統志燕尾河在保安衛南三十里

另詳洋河篇卷

謹案元史河渠志盧溝河自奉聖州界流入明史

稿河渠志桑乾河抵宣府保安州雁門雲中諸水
皆曾明史河渠志同水部備考春明夢餘錄

大清會典諸書所云雲中諸水皆曾皆指洋河也

又東流逕河神廟又東流逕磬山北磬山水自西南
注之

遼史地理志奉聖州武定軍磬山縣本漢軍都縣
山出白綠磬故名有桑乾河 方輿紀要磬山在
保安州西南百二十里有南北兩山唐置磬縣於

此金末爲礮山堡 一統志礮山故城在保安州
東南六十里明置礮山堡於此

本朝屬懷來縣

保安州志州南八十里卽大礮山州

東南九十里卽小礮山經年積雪望之若礮故名

礮山堡在州南三十里

譚案礮山故城道
理當以州志爲是

謹案水經注易水篇礮石山水出廣昌縣之礮石

山東流逕覆釜山東流注於易水今礮山水東北
入桑乾不入易水或疑保安州志東靈山卽大礮

山西靈山卽小礬山但旣屬二山又有東靈西靈之名則礬山非礬石山也注易水之礬石山水當另是一礬石山混并爲一遂疑水道有不通矣

迤南流逕縉山下曰縉山河

一統志縉山在保安州東南 陸隴其畿輔地圖

記桑乾河入保安州礬山堡縉山下名縉山河

懷來縣志縉山在礬山堡東三十五里桑乾河

河二水合流至縉山下

謹案縉山與大礬山相接其地交保安懷來之間
非延慶州西南之縉陽山也

又東南流逕猪窰堡則有清水河承長安嶺乾沙河
南流合溪河神仙溪河周四溝堡乾河乾石堡河閔
河沽河小渾龍乾河桑園屯乾河佛峪口水黑龍河
大柳河板橋河注之曰合河口

永經注濕水又東南左會清夸水亦謂之滄河也

畿輔通志嫺河在延慶州南半里懷來縣南一

里自延慶發源西流瀝延慶州懷來縣又西南流
五十里入桑乾河本古清夸水今訛曰媯河也

謹案唐書地理志媯州媯川郡懷戎有媯水貫中
遼史地理志可汗州有媯泉在城中明史地理志
延慶州東北有媯川俗名清水河下流注於桑乾
河是皆以爲媯河也畿輔通志謂本古清夸水今
訛爲媯河蓋今懷來縣本漢沮陽縣地唐長安中
始自潘城移懷戎縣及媯州來治其故懷戎縣卽

漢潘縣在今保安州西南界括地志所云媯州懷
戎及厯山媯水皆在其地二地迥別自天寶改郡
曰媯川金又改縣曰媯川皆沿唐初故名後不察
移縣之事遂以今縣爲潘縣誤指滄河爲媯川也

媯水潘泉
詳後附載

又長安嶺乾沙河有二一由龍門縣新

井莊一由麻峪口長安嶺一名槍桿嶺或訛作桑
乾嶺非也其地四面皆山夏雨迸澍水集長安堡
側橫潰四出冬則乾沙委糞而已其水大抵由清

有以達桑乾也 又案此清水河又一清水河也

源見洋源出延慶州北大海陀山下之龍潭南流

二里許逕古城堡又名古城河晉入地中東南十

二里許重源再發為黃龍潭延慶州志黃龍潭在永寧城西十里水源

深澗下有水在緡陽山下名晉陽泉方輿紀要緡陽山在永寧

縣北十二里山下有有溪河神仙溪河北來注之

為龍灣河遼史地理志儒州緡陽軍有南溪河有沽河方輿紀要團山在永寧西北十

五里溪河在永寧西北十三里源出團山西南合於沽河謹案溪河源州東北三十七里黃峪口

西南流逕團圞屯繞團山轉東流合黃龍潭爲龍
灣河又南流入於清水河水經注牧牛山水疑卽
此也神仙溪方輿紀要云在永寧縣西北二十里
下流入於溪河今水由古城堡東南流二三里卽
竭卽古城河水也以其伏
見不常故以神仙溪目之又西南流則有周四溝

堡乾石河堡東西灰嶺之水自東來會之

明史地理志延

慶州永寧北有周四溝堡

延慶州志東灰嶺在

永寧西十里西灰嶺有永寧南十二里閔河在永

寧西二里

謹案周四溝堡乾河在永寧城東北

三十里自管頭堡西流逕劉斌堡南又名大水泉

又西流逕大鴉口又南流逕炮兒灣又西流逕香

營堡又名香水河迤南流逕後所營又南流逕劉

家營有泉水流注之又南流爲神樹屯河一名閔

家河與屠家營河合入於清水河爲乾石堡河

在永寧城東二十里西流逕清兒鋪又西流逕永寧城北轉南與閩河合入清水河亦名大水泉在乾石河堡東南流五六里至石洞兒卽入地伏流下有乾河一道與閩河合也閩河東西灰嶺之水所匯而成者一名四司乾河出西灰嶺東北黃一名黃陂梁乾河出東灰嶺西北流與四司乾河合西北流至永寧城西南是又西南流逕北老尹堂爲閩河又西流入清水河

又西南流逕臨河屯名臨河

延慶州志謂源自八里店出亦名

東川

方輿紀要媽川在延慶州東十五里自永寧縣流入一名東川

又西南流逕

州城東環城爲濠行三十餘里又逕城西北隅則

有沽河

沽河卽水經注之渠水河也俗以爲潘泉非也延慶州志沽河自米家塚前發源西

流逕屈家堡三里又南流逕王家莊李家場白衣
菴東折入州南西水門逕南關出南水門復西折

逕小石橋合鵝水幹流叙次水道頗詳又西流爲白眼泉卽古九十

九泉也是爲滄河其上源潛通於溪河永經注魏

沮陽城東八里有牧牛山有又西流逕下堡屯
九十九泉卽滄河之上源也

又西流逕大營堡則有小潭沱桑園屯二乾河自

南來合之桑園屯乾河由興寶莊北西流至下屯

小潭霽乾河由興寶莊南西北又西流逕張老營
流合桑園屯乾河入清水河也

則有佛峪山溫泉水佛谷口水出延慶州西北山
卽水經注之大駟山水卽謂

寧安縣志

溫湯也南流六里逕郭家密一支別出東南流六里許至張仙營卽止正支折西南流爲黑龍河又水經注清夸水又西靈亭城水注之出馬蘭西澤中又左與馬蘭溪水會一統志馬蘭溪在延慶州西括地志云懷戎縣東北有馬蘭溪水今有黑龍河在州西三十里發源黑龍廟南流至懷來入河是也

房屯七里橋出境自城西至此長四十里而入懷

來東北境之解家庄則有大柳河之水自南來注

之

畿輔通志大柳河在延慶州西南二十里源出懷來縣養鴛池

南二十里水

又西南流逕石柱兒又西南流逕火

四時不竭

燒鋪抵縣城東北隅則有太山廟下硫黃泉水入

之

懷來縣志硫黃泉在東門外高坡下

逕通濟橋下又西流則有板

橋河水入之

板橋河即水經注之陽溝水也延慶州志謂之蔡河源出州西北中羊房

西流逕魯家莊又西流逕西洋房南折南流逕上板橋下板橋又南流逕小河屯抵常里營入於河

水河俗以爲即古阪泉非也明史稿也地理志延慶州東北有媯川相傳即古阪泉也蓋亦因板橋河

而誤也

又西南流則有黑山口之乾河入焉又西南

流逕水泉岡

宣化府志水泉岡懷來縣南八里

又西南流逕三營

四營又西南流逕大七營八營又西南流逕大寺

抵猪窩圈入於桑乾河

懷來縣志媽川城南二百餘步自龍灣入大海陀南

北泉水合流繞城外至猪窩圈入洋河古名清水河

謹案懷來保安接壤方輿紀要記之保安州下其實則抵懷來東北岸卽會入桑乾也

金史地理志德興府媽川

西北有合河龜頭館石橋

明史地理志保安州

桑乾河在西南東有媽川來入焉謂之合河口

方輿紀要媽川合桑乾河所謂合河也金時有合

河鎮今亦名合河口

懷來縣志和台口三河交

流舊名合河江明永樂間改今名山險水急不通

徒騎南至幽州安家漩三十里東至懷來六十里
正東至大山口三十里大山口并後洋口相連平
漫通人馬南至鎮邊二十里東至廟兒港口三十
里北至懷來二十里

謹案金史合河紀要以爲河合當是循土俗之稱
至縣志以爲和合且謂改自永樂考一統志通州
有和合驛舊名合和驛以白榆渾三河合流而名
永樂間置則是因合河之名同而紀要又有河合

之稱遂以訛傳訛而以驛名移之於此也

又東流逕安家灘其下爲沿河口

方輿紀要沿河口在懷來縣百三十里東南達宛平縣之王平口九十里西南至涑水縣馬水口百五十里沿邊次衝也 懷安縣志渾河合媯川洋河交流

謹案懷來縣屬河道與宣化縣保安州相錯自保家莊燕尾河以西首起岸之東密溝蠶子營東逕

南岸之湛家莊上葫蘆下葫蘆其北岸對長疇里
接宣化縣屬之石子坡東入孤山爲保安州境又
東至保家莊與宣化縣交界洋河合流處曰燕尾
河卽縣志所記之桑乾水也稍折而南爲保安州
之溫泉屯以下始全入縣西南境南流逕單家窯
孟家窯萬家窯河神廟新窯子豬窩圈大寺村豬
窩堡合河口水關堡寶家營安家灘北入順天府
宛平縣境卽縣志所稱渾河也自保安莊以西河

身長八十里自溫泉屯以南至沿河口河身長三十里縣志分桑乾渾河爲二尚非大舛惟云渾河一由長安嶺一由桑乾嶺二水交會故名渾河亦名桑乾夫桑乾山本無此山蓋卽洪濤山也亦曰雷山行水金鑑畿輔通志以桑乾水出此卽以名山已屬失實若長安嶺爲龍門縣屬一名搶捍嶺訛而爲桑乾嶺桑乾河並不經其下亦無有自嶺流入之水乃不辨桑乾搶捍之訛而轉分桑乾嶺

與長安嶺爲二且以爲渾河所由則誤益甚矣
又南流穿西山出水關臺逕石景山下名盧溝河今
爲永定河

潘自牧記纂淵海西山在順天府西三十里爲太
行之首方輿紀要太行之別阜也其相近者曰
香山香山之東接平坡山其並峙者曰覺山盧師
山吳道南集桑乾河過懷來行兩山間蔣一
葵渾河記從保安舊城過沿河口通石港口

謹案西山固太行之支脉也自沿河口以南屬宛平縣界重岡疊嶺名稱旣繁桑乾水貫其中者幾二百里所注之泉亦不一特拘束於兩山別無他道故所逕由諸山概從其略又盧溝固以水色黑得名然亦以其流經盧師臺下故卽以地名之也長安客話盧師山以神僧得名師隋末居此山能馴二龍子舊有寺卽以盧師名今清涼寺也唐書作盧思臺思乃師之訛也宋史宋琪傳端拱二年

將討幽薊疏言從安祖砦西北有盧師禪祠是桑
乾出山之口東及幽州四十餘里蓋卽今之盧師
臺也又舊唐書韋挺傳貞觀十九年將有事於遼
東擇人運糧挺至幽州漕渠壅塞遂下米臺側韋
懷質奏挺不先視漕渠輒集工匠造船運米卽下
至盧思臺方知渠門欲進不得還復水涸乃便貯
之迎達平夷之區恐未符聖策新書云自幽州距
遼二千餘里無州縣又自桑乾水抵盧思臺行八

百里渠塞不可通蓋擬欲通漕自今盧溝橋達於宣大以出薊遼而盧溝以上山徑逼仄不可通行然云下米臺側蓋其時幽州出米僅抵盧師臺而止不能遠泛尋其水道當云自盧師臺抵桑乾河行八百里方於情事有合又元史列傳至元二十八年有言灤河自永平挽舟踰山而上可至開平盧溝自麻峪可至蓐麻林朝廷遣太史令郭守敬相視灤河既不可行舟盧溝舟亦不通因陳水利

十一事水部備考盧溝而下舟楫時有之盧溝而
上直達宣府之保安州故元運道也自大同縣古
定橋起至盧溝橋務里村止約八百餘里內可以
舟行者七百二十七里驢駝搬運者八十八里明
實錄世宗嘉靖三十九年九月大同巡撫李文進
奏大同邊儲缺乏米價翔貴乞開桑乾河以通運
道自大同古定橋至盧溝橋務里村水運五節計
程七百二十七里陸運二節計程八十八里總該

造船二百六十隻置廩三百五十頭夫役一千三百四十餘人官十九員春秋二運可得米二萬五千餘石日久大通貿易寢廣公私俱利又盧溝迤南達天津另造淺船運米百石者改小灘兌運由天津逕達盧溝橋務里村交兌尤爲省便工部議覆本河不係長流泛濫則迅激難制乾涸則一葦不通又多山石阻礙每議輒止今既有成畫當如議舉行如有窒碍亦當從實奏罷上從部議此元

明兩朝欲踵韋挺故事而終無成功者也